# **Abholung**

## Mundschenk:

(mittig auf Leiter..)



Sie – is die Oanzischst die immer lacht, *Jahrgang:* 

die immer lacht die immer lacht die immer lacht

Oh, die Kerb mit uns feiert un alles mit uns macht, *Jahrgang:* 

mit uns macht, es is e Pracht is e Pracht!

Denn sie is unsern Sonnenschein,

### Jahrgang:

sie trinkt Bier, Hietchen un aa mol Wein...

Sie – is die Oanzischst die immer lacht,

### Jahrgang:

die immer lacht die immer lacht...

#### Mundschenk:

(oben beim Kerbmädsche)

Zu der ruffgekräwwelt, moi gonzer Stolz, bin ich die Ladern aus Alu, un nit aus Holz.

Im de allererste Kuss von dir zu bekumme, häbb ich moin gonze Mut zamme genumme.

En Oublick, wie er schenner kennt nit soi, Kerbmädschevadder, schenk uns mol Oan oi.

Un sou heb ich nun moi Glas uff unser bestes Stick, unser Mädsche, ich bin werklich dodal entzickt.

Die Nummer Oans wird se fer uns in Zukunft immer soi, Kerbborschte, guggt se eich ou, is se nit foi!

Alla ehr Leit, ich will gor nit länger wadde, un mim beriehmteste Zimmner Ausruf unser Kerb jetzt stadde....

DIE ZIMMNER KERB SIE LÄWE ....

# Kerbmädsche:

Wochelong häbb ich uff diesen Doag gewadd, for Uffreschung woar ich schun gonz mallad.

Un jetzt schdäihn ich hier endlich mit aich, mit sou veel fräihliche Mensche, soweit mein Auge reicht.

Ob hait kenne mer feiern un alles brenge, on unsrer Kerb, do dutt koaner schenne...

Ob hait doun mer feiern bis mer nit meij kenne, uff unsrer Kerb, älter als onnern Feste, ich will koa Nome nenne.

Moin Mundschenk, moin Kerbvadder un ich mitte drin, mit all moine Kerbborschte, ich mich hait wirrer finn.

Schenner kennt de Doach heit werklisch nit stadde, ich konns ehrlisch gesoat, kaum noch erwadde..

Un jetzt losst uns zusomme trinke de erste Schluck, un donn gäits lous, äwwer dass mer aa blous koans unners Recksche guckt!!!!

# **KERBREDD**



### **INTRO:**

### **Intro und Holzisch Latern**

Mundschenk, Thomas o. wer auch immer
Owwacht ehr Zimmner un Ruh jetz do unne,
mer häwwe desjoahr en hadde Oufang gefunne.
Mer hoffe, Ehr schdäiht gut, häbt e voll Gloas in de Henn,
Weil wos glei kimmt, krieht mit eich blous e häppi end.
Macht eich uff Oan gefasst und macht bitte all mit,
weil blous donn, wird de Oufang aa en räschte Hit.

Äla on eich do unne, boal isses wirrer sou weit, doch jetz is die Kerb drou, es word äwwer aa Zeit.

In Dibborsch häwwe se des Joahr die Hymne gesunge, als ichs gehäijet häb, sinn mer boal die Träne gekumme.

Un wos die Dibboijer wohl ohne uns Zimmner wärn?? Krieje die Stombers des Joahr sougoar die holzisch Latern.

Do kenne mer echt stolz druff sein, sou e subber Kapell hier in unsere Reih'n.

Doch Schtompers gäiht zum Speele jetz blous nit als fort, speelt liewer meih in unserm schäine Heimatort. (erhobener Finger)

Un for alle Dibboijer do unne mache mer uns jetz richtisch krumm,

Schtombers schpelt uns emol es "Äla-Bumm"

## Dibboijer un soi Ullerborn

Doch koum, dass die Latern in Zimmern ougekomme, Hot sich en Dibboijer dem Thema ougenumme.

In de Zeitung wor's zu läse, vier spaltisch un soin Nome glei mit debei,

iwwer die ULLERborn isses gonge, wonn de roi kimmst vorne rächts do glei.

Die Dibboijer härre die Ullerborn baue losse, wärn in 20er also die Gute gewese,

En Heilischeschein fer den Monn un all soi Narrhalese.

Wohl gemerkt, e Ferma vun Zimmern hot die Ullerborn fer se gebaut,

On sou e grouß Sach häwwe se sich wohl nit drou getraut?

En geschichtliche Beweiß, wos wär Dibborsch ohne uns Zimmner blouß worrn?

Nix krieje se uff die Reih, nit emol die Ullerborn, speelt mer doch "mim Bus nach Ullaborn"

Ullaborn, Ullaborn, mer foahrn mim Bus noch Ullaborn, do gits mim Knippel uff de Knorn, mim Bus noch Ullaborn..

Es gab zwar ewe erst e Lied, äwwer do stimm' ich glei noch oans ou...

Ich konn nit onnerst als "uijuijui juijuijui...ouwouwouwou"

## Vorstellung

Doch jetzt weirer mirrem echt wischtische Thema, unser Vorstellung basst doch jetz gut do ins Schema.



#### Kerbmädsche (wird vorgestellt von Simon)

Carolin

Do newe mer schdäiht'se unser goldisch Moad, die Carolin Herzog, e oig schäi Vormaad.

Raus stamme dutt se aus erer gonz beriehmte Kneipe, die beste Giggl dutt ehr Oma Christl sellemols dort zubereite.

De Opa Heinrich trug 2006 schun die golden Scherp, geel-schwarz woar soi Fabb sellemols on Kerb.

Ehr Mama is die Christine, un ehrn Babba de Thomas Alfred Herzog,

en Negativfassnoachter den es aus Köln sellemols noch Zimmern zog.

Aus de ehemalisch Kneipe konn unser Mädsche oafach nit weg, weil im Münchner Hof do schdäiht hait noch im erste Stock ehr Bett.

#### Mundschenk (wird vorgestellt von Caro)

Philipp

Iwwerm Mundschenk soi Sippe wisst ehr all bestens bescheid, Philipp Tesch, do schdäiht er, ehr liewe Leit.

Dorch Politik un die Kersch kennt ehr soi Modder fast all, die Brigitte turnt hait noch ob un zu dorch die Mehrzweckhall.

Soin Vadder hasst Gunther un kimmt nit vun do, äwwer die Oma macht alt un jung mit selbstgenähte Trikots froh.

Un ehr säht en sicher aa all noch hocke, beim Meo im Eck, de Horst soin Opa, mim Pasewald-Gedächtnis-Gedeck.

#### Kerbvadder (wird vorgestellt von Tesch)

Simon

Unsern Kerbvadder eröffnet in soine Familie e nai Kerb-Dynastie weil bei soine dibboijer Modder Daniela gabs des noch nie.

Soin Vadder Thomas is aa vun weider weg, doch zamme häwwe se in Zimmern ehr gemoinsammes Nest entdeckt.

Geschluppt is de Simon, Gärtner hast er hinne, un dutt soi Familie jetz in Zimmern oibringe.

Ich kenn ehn schun long, schun als kloaner Buh, ich musst bei de Oma donze, de Oanner glotzt bleed/mer debei zu.

Spärer hinge mer zamme on de Kletterwand, hait schenke mer de Kerb unsern gonze Verstand.

Un um des zu demonstiern, stimmt all mit oi, unser Kerblied zu singe, fänd ich jetz foi.

Kerblied: Mark Forster "wir sind groß"

### 525. Kerb—Jubiläum

Verzähzwaaunneunzisch de Kolumbus woar oa Joahr sou späiht, In Zimmern hot mer oa Joahr frieher schun gewisst wie Kerb feiern gäiht.

Mim Laarerwoue is die Bobbe des Joahr vun weit her gekumme, vun Sehem bis noch Zimmern hot se de Wäg uff sich genumme.

Finfunachzisch word se schunemol sou dorsch gonz Hesse gebroacht,

äwwer sellemols hot mer sich noch koa Gedonke iwwer Historie gemoacht.

Eischentlisch word om Brickelsche un im Bläätsche schun alles driwwer verzäihlt,

drum loss ich des jetz un kimmer mich im onnern Geschichte un wie's de Leit sou gäiht.

"Wos solle mer trinke?" Des Lied kam gestern bei de Obhoulung schun gut ou. Uffwache Stombers, Ehr seit wirrer drou.

Wos solle mer trinke on de Zimmener Kerb? Wos solle mer trinke, mer houn Dorscht?

Wos solle mer trinke on de Zimmner Kerb? Wos solle mer trinke, mer houn Dorscht?

Es wird genung fer jeden soi, mer trinke minoanner roll des Fass do roi, mer trinke minoanner Bier un Woi

# **Aktueller Jahrgang**

Als aktueller Kerbborscht hot mer schun e Joahr vorher e Menge Pflischte,

do muss mer sich erste mol longsom denoch richte.

Oufonge dutts meistens mit Tagunge beim Kerbveroin, sou gewehnt mer sich sou longsom bei denne oi.

Iwwer e Wocheend gäihts spärer meistens donn fort, äijendwouhe, on nen obgeschiedene Ort.

Doch monche mache sich do vorher echt ehr Gedonge, soll ich do mit orrer mach ich liewer de Kronke?

Der Oane der will donn liewer doch nit do mit, weil bei Priefunge, do krieht der immer glei de dinne – Schit.

E **Klausur**tagung – des kennt halt nit jeder, äwwer geprieft wern die Buwwe eischentlisch erst spärer.

Geprieft werd on de Kerb wie ehr sicher all wisst, de **Kerbmarsch** es oanzisch rischdische Lied dodezu is.

Die Zimmener Kerb, die Zimmener Kerb, die Zimmener Kerb ist do, wo sin die Leit so froh, wos sin die Leit so froh....

### **letzter Jahrgang**

Die Kerb häwwe mer vor zwaa Doach iwwergewwe bekumme, als "Dongescheen" häb ich mer iwwer eich jetz wos vorgenumme.

Do lief ja letzt Joahr nit alles wie geschmiert, sou monsches Maleer is eisch do bassiert.

Wonn isch drou denke, fer de Dienstoach, die trauernde Gemeinde,

vergesst er fer die oarm Kerbbobb die Trage vorzubereite.

Dere oarme Bobbe doun se oan verzäihle es brenne wär nit sou schlimm,

un hängegere e "Es wird alles gut" Lebkucheherzje im.

Die Rute worn aa ziemlich spärlich beschdigt, nor oa oanzisch Portmoneee häbt ehr gezickt.

Un mit de Scherpe häbt er gesport om falsche End, beim Dreigestirn do häbt er fablisch ziemlich gepennt.

Un es Kerbmädsche noch de Wahle, ich word boal verrickt, (lachen)

hot in WhatsApp als erstes ehrn neie Status noigedriggt.

### Mundschenkmuddi

Un dodebei kimmt mer glei noch oan in de Sinn, Mundschenkmodder zu soi is monschemol schlimm.

Do is mer verantwortlisch fer alle Borschte, ou noa.

De oa wollt Noachts blous e Plaster fer soi kabuddenes Boa.
.... Orrer Oarm orrer en Finger orrer sou onnern Dinger =>erklären

Der klingelt beim Mundschenk, die Modder macht uf, un kläibt im nächste Atemzug des Plaster do druff.

Die Deer fällt schtump ins Schloss enoi: "Des derf doch jetz nit meschlisch soi!!!"

Do schdäihtse jetz im ehrm Noachthemd wie Gott sie schuf, doch ehr zwa Mundschenke schlofe, do hilft aa koan Ruf.

Äijendwonn erbarmt sich ehrn Monn, weil er is ja gonz nett, macht die Deer uff: "Ach du bist's." (gleichgültiger Tonfall), un gäiht wirrer ins Bett.

Wos e Glick hoult er se wirrer zu sich noi, denn ohne dich schoaf ich hait Noacht nit oi.

Ohne dich schlaf ich heut Nacht nicht ein, ohne dich fahr ich heut Nacht nicht heim, ohne dich komm ich heut nicht zur Ruh, das, was ich will bist du.

### Treppenhaus-Story

Wos Ähnliches is em Junge Monn on Kerb aa noch passiert. Der hot sich vor soim Mädsche ziemlich blamiert.

Er säigtere bescheid un rifft se korz ou: "Ich gäihn hordisch dusche un lehne die Deern blouß ou."

Doch de Noachber im Haus hots nadierlisch nit gewisst, kimmt hoam und werft die Hausdeer ins Schloss, weils immer sou is.

De Bu wor schun naggisch un krieht's äwwer mit, rennt naus un robbt die Deer wirrer uff sonst klappt des ja nit.

Wos soll ich soue, es kimmt nadierlisch wie's hot kumme misse, die Wohnungsdeer fällt zu, un er woar beschisse.

Soi Flämmsche kimmt ou un wie en betrebbelte Hund sieht er aus,

blous mim Honddischelsche im die Hifte, hockter im Treppehaus.

Wos e Glick kimmt soin Brurer korz druf aa dehoam ou, un er konnt noi zum Dusche, wos wor er sou frouh.

Zusammegefasst fällt mer do oans blous dezu oi, Beim Deern uffhoale muss mer cleverer soi.

# Auto will auch heim

Letzt in Zimmern, in erer bekonnte Kneipe, hot e Päärche ordentlich ... ja... "gefeiert"– ich wills mol nit iwwertreiwe.

Äijendwonn wor's donn aa feer die Zwa genung, Zeit sich uff de Hoamweg zu mache, noch em letzten Trunk.

Doch vor de Kneipe do fällt denne oi: "Verdammisch, unser Auto häwwe mer ja aa noch debei."

Se iwwerleije blous korz un merke donn schnell: "Foahrn wär fer uns beide heit miserabell".

Doch es Auto do losse, des wollte se nit, also nemme se ses korzerhond oafach mit.

Sou packe se ou, Hondbremms un Gang eraus, als kräftisch geschowe, jetzt gäihts nach Haus.

Doch weit hot mer se dodemit nit kumme lasse, es Auto schiewend dorch Zimmerns Gasse.

Die Leit in de Kneip häiern vun drauß es Stöhne – echt krass, denke es bassiert sonst wos vor de Deer uff de Gass.

Verständische doun se liewer mol die Polizei, weil die, die om Auto hänge sinn wohl nit gonz in de Reih.

Die Polizei guckt sich des Spektakel korz emol ou, Un denkt sich donn: "die hoale mer mol liewer ou." krieje mer drou Also werds Audo wirrer newe he gestellt, demit nix passiert, un vum Pärche sicherheitshalwer de Labbe un de Schlissel oikassiert.

Doch ich fräig mich jetz, woar des sou korrekt? Weil gefoahrn sin die Zwa jo eischentlisch net.

# Döner macht Schöner

Wonn mer Hunger hot is mer frieher bein Metzjer gange, weil esse hält ja Leib un Seel zsamme.

Hait hoult mer sich liewer hordisch en Döner, weil Döner macht ja bekanntlich schöner.

Aa en junge Roure hot sich des Noachts emol gedenkt, un is uffm Hoamweg beim Dönerloade enne geschwenkt.

Er bestellt sich woas foines zum Esse, "es is ewwer zum Liefern, blouß nit vergesse!" (Fingerzeig)

Un wie soi Esse ferdisch verpackt zum Brenge, fräigt er häflich "därf ich aa mit in des Auto enne?"

Weil es däd doch sicher koa Fissematende mache, er foahrt eh bei mich hoam, un brengt mer moi Sache.

Un die Moral vun der GeschichtDöner is billischer als wie e Taxi!Reimt sich halt nicht.

# **Firmung**

Chörn gits in Zimmern, wer s nit waas des sinn Leit wou gern zamme singe.

Oaner devo dut uf de Fermung (in de Kersch) en ziemliche Klopper bringe.

Koum dass se ehr letzt Liedche im Gottesdienst häwwe gesunge, Sinn se alle Monn wie e gestoche Hinkel vun ehrne Stiel uffgesprunge.

Un beim vorbereite vom heilesche Abendmahl, verlasse se mit lautem Gepolter im Kollektiv de Kerschesaal.

Wonns äijend en Veroin gewese wär det mer soue: "(Se kenne's nit onnerst), ei ja gut", (abwinken) Äwwer die stecke mit de evangelisch Kersch unner oam Hut.

En Grund wern se gehatt hou, vielleicht gabs se e onner Pflicht. Äwwer, eigentlich macht man so etwas nicht.

E Lied fällt mer oi, äwwer des konn mer nit bringe, Orrer kennt ehr uf italienisch es 'Cantare' singe?

Volare, oh oh oh oh

#### Porto un de Bus

Owends im zeije, die Kneip endlich zu. Denkt sich de Wert, ich läig mich korz emol zur Ruh.

Spärer im Middernoacht, sollts lous geih mim Bus. Skifoahrn mit de Männer, wie jed Joahr en Genuss.

Do lait er de Kerl, schläft friedlich un sieß, bis korz vor de zwelf ihm de Schreck fährt in die Fieß.

In zeije Minute – do gäiht schun de Bus, un de kloa Porto sich jetzt spute muss.

Soi Fraa hippt mit ausem Bett un stumpt en ins Audo enne, mit soine struwwelische Hoarn dutt mon koum noch erkenne.

Sie om Steuer in ehrm allerfoinste Schlofgewand, all des, demit ehrn Simbl pinktlich am Bus donn stand.

Die gonz Sach woar alsou schun ziemlich spät, "wer hat an der Uhr gedreht?"

Wer hat an der Uhr gedreht, ist es wirklich schon so spät Soll das heißen ja ihr Leut, mit dem Spaß ist Schluß für heut.

## "Die Kurzmeldungen"

Jetz kumme noch e poar gonz korze Fetze, iwwer Veroine un Politik doun mer mol hetze.

Zum Beispeel de Jiengste in de Zimmner Politik – ach, zisch Noame hott der, un aa mim Alter do dutt sichs Blättsche ziemlich schwer.

Dreimol häwweses ses versucht rischtig zu mache, ich häbb mich boal nit meih oigekriegt vor lauder lache (abwinken)

Uff de Gemoa sinn se groad vun de helle Sorte, zu Öffnungszeite schdäiht mer aa emol vor verschlossner Pforte.

Un zum "Neubürgerempfang" om Jahrmoart mit Rundgang un Sekt,

wern Babys vun old Oigesessene geloare, mer bleibt bous ironischer Respekt.

Es Härschkopphaus word "versehentlich" aa nit obgerisse, meih muss mer dodezu eischentlich nit wisse.

Die Lait vum Kerbveroin häwwe sich zwische de Joahrn zum Laafe getroffe,

un häwwe dodebei in Oldem (Altheim) die Wertschaft radikal leer gefresse un gesoffe.

Friehjoarsfest – vorwärts – boim oltoigesessenne Verein, lädt herzlichst uff em Flyer - halt emol ohne Datum - ein. (ironisch / unglaubwürdiges Reden)

Un die Kloa-Zimmner Fußballer mache sich aa nit verrickt, do werd beim Konter de Blatzwadd mim Straawoue uffs Spielfeld geschickt. Zimmern is eh grad rischdisch grouß im kumme, beim Hessetag häwwe mer schun teilgenumme.

Un aa in de Hesseschau häwwe mer uns ordentlich präsentiert, mit iwwer 150 Kerbborschte hot sich unser Ort offeriert.

Die Feierwehr is aa wirrer debei, dorch die zuen Garage zu foahrn is des Joahr on de Reih.

Wie en Kolter laits Door vorne uffm Auto druff, also ich mach moi Garage als vorher uff.

Un Brandaktuell (betonen), manche douns vielleicht goar nit wisse Iwwermoije doun die Kloane ehr Ränze hisse.

Weil donn, ehr Leit, schnallt eich gut ou Sinn in Zimmern erste mol die Erstklässler drou

Sougoar en Silwerne des Joahr, den hotts hatt getroffe, soin Buh hot es erste mol Schul, (Fingerzeig) Moije werd also koaner gesoffe!!

Des is des Joahr die letzt Kerb uff dem Platz, guggt eich gut im, in e poar Woche zaggern die Bagger hier komplett alles im.

Äwwer ehr wisst's all, oa Gudes hott's, mer krieje e Kerb-Denkmol do uff de Platz.

# <u>Geflügelausstellung</u>

In Zimmern git's en Monn, er kennt en fast all, der gäiht als zur Gefliegelschau do in die Hall. (Fingerzeig auf Halle)

Zu diesem Termin macht er soi Hinkel desmol besonnerst foi, un sprieht se groad emol mit e bissje Trockeshampoo oi.

Doch was donn bassiert, er hätts eischentlich wisse misse, die Ferrern blose sich uff, wie e uffgeblatzt Sofakisse!

Un um denn Fauxpass donn schnell zu kaschiern, dutt er die Ferrern korzer Hoand mit Hoaargel beschmiern.

Sou kenne sich die Hinkel jetzt doch noch säije lasse, un vun de Juri zuordne losse in e guuude Klasse.

Äwwer die Juri is verwunnert un denkt: "Wos en Hohn. Do riechts doch statts noch Verrervieh wie im Friseursalon."

#### **Em Buh soi Eier**

Noch sou e Ding:

Es woar emol en hungrische Buh, ich nenn en mol Raff-nix, (nor mol sou), un soach nix dezu.

Der schtäiht dehaom mit veel Hunger in de Kich erim, äwwer fehl finne dut er nit in soim Kiehlschronk drin.

E poar Eier, die säije doch gut noch aus, doch mit de Salmonelle, do kenn der sich nit aus.

Also nimmt er de Häierer in die Henn un fräigt soi Hoamche im Rat,

weil sou ebbes des hot doch jed Fraa sofort parat.

"Moin Schatz, nimmst e Gloas Wasser un dust es Ei do enoi, schwimmts Ei donn unne, donn is es noch foi!"

Er macht sich ons Werk, sou wie ehm gehaße. Es Ei ins Wasser, im zu priefe die vermeindliche Gase. Fingerzeig

Noch e poar Minute rifft er äwwer wirrer beiere ou: "Her, wie kumm ich donn jetzt on moi Ei wirrer drou?"

Des Ding dimbelt als im Wasser erim, blouß es woar koa Schoale mei drimerim!!

Un die Moral vun der Geschicht, bei Spiejelei im Wasser siehste die Samonelle nicht!

Die Kapell dodezu speelt uns nun, den Hit vun sellemols: "Ich wollt ich wär ein Huhn"

ich hätt nicht viel zu tun. Ich legte täglich nur ein Ei und Sonntags auch mal zwei.

### zum Schluss

Un vum Ferrervieh, dramaturgisch kennts koum besser basse, kumm ich jetz zum Schluss, glei schallts dorch unser Gasse.

Die Angi moant: "Ja wir schaffen das", die waas halt wie's gäiht. "Yes we can", orrer wie der oane Ammi des als säigt.

Des wor die Kerbredd, ich häb's geschafft un ich bin frouh. Ehr Leit nemmt longsom schunemol Gesangshaldung ou!!!

Ich hoff, ehr woart minonner aa all rächt om Schmunzle, Monschemol konnt mer sischer aa die Stern blous noch runzle.

(Wonn's eich gefalle hot, donn derft ehr glei gärn driwwer schwetze.

Wonn nit donn

- A) dout halt oafach die Lippe zamme petze.
- B) fongt besser goar nit erst ou zu hetze.)

Vehl Spaß winsche mer drei eich do unne heit noch, Mirrem bis noch Dibborsch schallende: Die Zimmner kerb se läwe... (hoch)

Schdombers, un jetz macht eier Instrumente bereit, Die Hymne zum Schluss. Des woar's ehr Leit!

LIED: Zimmner National Hymne